



Istinski je univerzalan i kao životni aksiom prihvatljiv naš šahovski slogan GENS UNA SUMUS, trajan i vrijedan u kontinuitetu i svakom vremenu i mjestu.

Upravo ovih dana, boraveći u gradu Konjicu, kao šahista i učesnik velikog i sjajno organizovanog, tradicionalnog petog po redu "Konjic Open 2016", probudio je u meni neke uspomene i prisjećanja na moje mladalačke i pionirske dane, tamo davne 1950. godine.

Na ovom turniru u šahu bilo je dosta učesnika - šahista, upravo mlade, perspektivne i **nadarene generacije**, na prelazu iz pionirske u dob omladinaca, koji su svojom igrom, znanjem i ponašanjem istinski pokazali sve ljepote ove igre, kućnog odgoja i vaspitanja i iznad svega zavidnu teoretsku naobrazbu, zahvaljujući i vremenu savršenstva i primjene informatičke, tj. kompjuterske tehnologije.

Veoma bitan, da li i **presudan faktor** u ovoj cjelovitoj odigranoj šahovskoj predstavi svakako je faktor neposredne podrške roditelja, koji **bezrezervno**, u svakom pogledu i na svakom mjestu, prate i podržavaju svoju nadarenu djecu. Svakako, rad i talent, uz to i konkretna brižna **roditeljska pažnja** i podrška ljudska su mjerila i doprinosi za dostignute vrijednosti u svakom sportu, a posebno u šahovskoj igri.

